

GiuRu: www.giuru.ch

Power da dunnas: Dues novas suprastantas tar la GiuRu


DAD UOLF CANDRIAN E FLAVIA HOBI

■ Sonda passada ha gi lieu la radunanza generala da la Giuventetgna Rumantscha (GiuRu) en lur local a Cuira.

La suprastanza bunamain cumpletta cun il president *Wolf Candrian*, il cassier *Sven Gaberthüel*, l'assessor *Leander Albin* e l'actura *Flavia Hobi* han preschentà il rapport annual illustrà cun fotografias ed infurmaziuns davart projects sustegnids da la GiuRu. L'emprim quint annual da Sven Gaberthüel è vegnì acceptà suandant la recumandaziun a scrit dals dus revisurs *Fabian Augustin* e *Silvio Caprez*. Quest onn èn be dunnas suandadas l'invit a la radunanza.

Tranter las activitads da l'onn passà ha il president numnà diversas collavuraziuns, sco per exempel cun la Lia Rumantscha u *latabla.ch*, saja en connex cun il project perrumantsch che va en la terza runda, la collavuraziun pertutgant las medias rumantschas u l'acziun *Na No Billag a Turitg*, nua che la GiuRu ha pudì mobilisar ca. 40 persunas rumantschas.

Vinavant era la GiuRu l'onn passà preschenta als seminaris da la YEN, la giuventetgna europeica da minoritads ed ha cun il seminar a Trin il favrer da quest onn er organisà il seminar da kick-off sut il motto «messadi en buttiglia». Cun *Gianna Beeli* ha la YEN da nov perfin ina Rumantscha sco presidenta – la GiuRu spera che quai profundeschia la collavuraziun ed auzia la participaziun als seminaris e giavischas bler success ad ella. Ils datums dals proxims dus eveniments organisà da la YEN èn il festival da diversità «Terp of Tales – Tuma da paraulas»



Preschentanziun e discussiun davart midadas durant la radunanza generala da la GiuRu.

FOTO F. CAVEGN

dals 5–12 d'avust 2018 a Leeuwarden/Ljouwert tar la minoritad frisa ed il seminar d'atun dals 8–14 d'october 2018 a

Bratislava en la chapitala da la Republica slovacca tar la minoritad germana. Midadas hai era dà entaifer la suprastanza.

L'assessor *Leander Albin* ed il vicepresidente *Maurus Bundi* ch'era absent la saira da la radunanza generala èn vegnids re-

elegids. Flavia Hobi ha communitgà sia demissiun sco actura ordavant a la suprastanza.

La suprastanza ha regalà ad ella per ses engaschi sur quatter onns en suprastanza in matg flurs cun ragischs per ch'ella n'emblidia er en l'avegnir betg sias ragischs rumantschas. Gist duas giuvnas èn sa decleradas sco interessadas per in post en suprastanza. Quai è per l'ina *Michelle Parli* da Zuoz che studiega oz a Winterthur linguistica appligada e per l'autra *Naomi Arpagaus* da Laax che frequenta actualmain anc la canti. Naomi è cunquai la pli giuvna en la suprastanza e l'emprima suprastanta naschida en quest millenni. Grazia a la midada dals statuts èn ellas vegnidas elegidas unanimamain. Uschia sa cumpona la nova suprastanza cun duas giuvnas e quatter giuvens nov da sis persunas, tge che munta ina sfida, ma po era funcziunar fitg bain. Cun *Michelle Parli* sco actura è era puspè l'Engiadin'Ota represchenta tar la GiuRu.

Per ina discussiun viva han procurà las midadas dals statuts.

Il president *Wolf Candrian* ha preschenta las singulas midadas proponidas, ils commentaris da *Clau Dermont*, *Simona Cajacob* e *Vincent Augustin* pertutgant quest'emprima revisiun ch'èn suenter intginas adattaziuns vegnidas acceptadas unanimamain da la radunanza: Quel resultat cler mussa che la radunanza era preparada bain.

Durant la pausa e suenter la radunanza generala ha *Fiona Cavegn* fascinà cun sia musica ed ils preschents èn anc sa radunads ensemen en la Werkstatt. Grazia fitg a tuttas per vegnir a la radunanza e per la bella saira.

Sen viseta tar igls Tudestgs an Pologna

DAD ANGELICA AUGUSTIN

■ **Scu mintg'onn è er chest'onn gia li igl «seminari da Pasca» dalla YEN (Youth of European Nationalities). La YEN è l'unioni tetgala da radond 40 minoritads europeicas. Uscheia è er la GiuRu (Giuventetgna Rumantscha) stada anvidada agl seminar tgi è chest onn gia li davent digls 23 anfignen igls 29 da mars.** Tals seminaris vignan organisos quatter gedas ad onn dalla YEN e dalla uniun da giuvenils dalla minoritad locala. Chest'eda vainsa visito igls Tudestgs an Pologna ad Opole, en martgea maneval da Breslau.

Scu gio menziuno organisescha la YEN mintg'onn ples seminaris. Chels seminaris èn mintgamai colliias cun en tschert project u cun en tema. Chest onn sa nomna igl project «Minority Messengers» u per rumantsch «curriers da minoritads». La fegnameira digl project è da far attent igl public europeic digl fatg tgi dat tantas minoritads e dalla impurtanza e valeta tgi minoritads pon aveir. Antschet è igl project igl favrer passo a Trin noua tgi la GiuRu è anvidado agl seminar d'introducziun. Durant lezza emda on igls participants elaboro metodas scu tg'ins pudess derasar igl messadi da minoritads. Ed ossa tgi seminaris da Pasca vagn nous pruo dad applitgier las metodas e da scolar igls giuvenils tgi on betg savia sa participar a Trin. L'idea tgi è sa sviluppada è da visitar scolas, centers da giuvenils, antupadas e camps da giuvenils. Pi concret duessan neir «rimnos» 50 voluntaris (participants digl seminaris ed oters commembers dalla YEN) tgi èn pronts da far dus anfignen treis da chellas visetas ainten l'ur regiun, seia chegl tigl giuvenils

da l'ur minoritad u tar tals dalla «majoritad». Scu amprova vagn nous visito dus scolas damanevel dad Opole. Ena scola primara bilingua (tudestg-polac) ed ena scola media polaca.

Igls unfants e giuvenils on musso interess cura tgi nous igls vagn ampruo da render pi famigliar igl tema da minoritads an moda nun-formala, c.v.d. cun gis ed interacziun. Scu usito è durant l'emda ad Opole pero betg angal nia fatg

scola. Alla YEN ègl er adegna fitg impurtant da rinforzar la cuminanza tranter igls giuvenils dallas differentas minoritads europeicas. Chegl è nia cuntanschia cun differentas activitads tgi on surtot gi li la seira.

Ena seira vagn nous p. ex. pudia gustar different damagler e dabever tradiuzional tgi mintga minoritad è purto da l'ur regiun. Er en de d'excursiun ègl do, cò vagn nous visito igl bel martgea da

Breslau ed igl anteriour camp d'internamaint a Lamsdorf.

Siva igl seminar è igl 29 da mars anc gia li la radunanza generala annuala dalla YEN. En pèr commembers èn aposta viagias anfignen Opole per chest evenimaint. Tranter oters er *Gianna Beeli* da Sagogn, ena Rumantscha da 24 onns tgi è neida eligeida scu nova presidenta dalla YEN. Cordiala gratulaziun a tè Giuanna.

Ed anc ensatge plaschevel è capito curt avant Pasca: igl dumber dad en miliun sottascripziuns per la «Minority SafePack Initiative» è nia cuntanschia! Chesta iniziativa è igl intent da migliorare las situaziuns dallas minoritads dalla UE.

Er schi chegl pertotga betg igls Rumantschs vagn er nous dalla GiuRu gia grond plascheir per igls noss ameis dalla UE.



La suprastanza actuala da la YEN cun Pia Šlogar, Marin Bodroži, Ydwine Scarse, Giuanna Beeli e Jakob Schäfer.

FOTO G. NOVAK